



ル 6
2529
22



門外名
號2529
卷49-33



吉林通志卷八十四

人物志十三 金十二

完顏鄂博庫

温特赫伊蘇瑪勒

富珠哩伊隣罕

布薩揆

宗浩

瓜爾佳清臣

完顏薩布

持嘉烏新

完顏仲德

完顏鄂博庫

原作兀不喝

會甯府海古勒

原作海姑

寨人年十

三充女直字學生補上京女直史再習小字兼通契丹文字充尙書省令史天德初除吏部主事鞫問扎

蘭原作路詐襲穆昆事人稱其能擢右拾遺海陵謂

之曰朕始聞汝名試以吏部主事今計其實優於所

聞遠矣累遷右司郎中從海陵伐宋至淮南聞世宗

卽位於遼陽鄂博庫入白其事海陵沈思良久曰卿

等始聞之邪我已知之遣人往矣此大事勿泄於外

大定二年秩滿當代世宗喜其善敷奏特詔再任謂

宰臣曰鄂博庫爲人公忠後來有如斯人者卿等宜

薦之其見知如此金史本傳幹罕原作已平詔罷契丹明

安穆昆其元管戶口皆隸女直遣往區處分置人戶

贍貧乏其未嘗爲亂與來降者仍舊若未經罷去明

安穆昆合承襲者仍許承襲兼括買契丹馬匹尋改

同知大興尹遷橫海軍節度使初到官獻囚能得其

情人以爲不冤五年卒於官宏簡錄

温特赫伊蘇瑪勒原作温迪原作率賓原作屯茂赫辰原作

春憑歡原作人徙上京和掄舍哩原作忽原作兄卓諾原作木輦原作國初

有功授世襲穆昆伊蘇瑪勒性忠正強毅善射有膂

力皇統初襲兄穆昆積戰功爲洮州刺史謂人曰穆

昆兄職也兄子烏楞古原作幹魯古今已長矣遂以穆昆

讓兄子宗弼聞之曰能讓世襲可謂難矣除貴德州

刺史改伊勒敦兀詳袞烏庫哩原作烏古論部族節度使

改昌德軍正隆四年大徵兵南伐秦州明安定遠阿

巴原作阿補以所部叛還與七穆昆兵執之勒其眾以付

大軍金史本傳契丹反率數千人殺賊萬餘於雅哈原作伊改

河以功遷臨潢尹宏簡錄世宗即位賜手詔曰南征諸

將士及卿子姪安遠烏楞古蘇布特原作斜普兄弟具甲

仗悉來推戴朕勉即大位卿累世有功耆舊之臣緣

邊事未甯臨潢劇任姑仍舊職聞樞密副使白彥敬

原作約索南京留守赫舍哩原作石烈志甯來討契丹今已

遣人往招之其家皆在南京恐或遞去兼起異謀若

至則已若不至卿當以計執而獻之兩次遣人招誘

招討都監老和尚去人不知彼之所在久而不還兼

老和尚不知朕已即位卿可使人諭以朕意如來降

悉令復舊邊關之事可設耳目是時幹罕原作窩幹已反

領兵數萬來攻臨潢諸路軍未至幹罕勢益大伊蘇

瑪勒領城中軍士六百人邀擊幹罕數接戰勦殺甚

眾所乘馬中流矢而仆為賊所執使招城中人曰生

死在頃刻能使城中出降官爵如故不然殺汝矣伊

蘇瑪勒罵賊曰我受國家爵祿肯從汝叛賊乎賊執

之至城下迫脅之使招城中其妻子官屬將士登城

臨望伊蘇瑪勒厲聲曰我恨軍少不能滅賊人生會

有一死耳汝輩慎勿降賊一旦開門納賊城中百姓皆被殺掠毋以我故敗國家事賊無能為賊怒殺之城中人皆為之感激推官麻珪益繕完城郭右監軍實圖美原作神土懋輔國上將軍阿索美原作阿思懋乘城固守賊不克攻遂引眾東行金史本傳大定之初幹罕橫噬有弗戢之畏焉志甯傳贊伊蘇瑪勒死得其所忠義傳序固所謂賢也志甯傳贊記曰君子聽磬聲則思死封疆之臣傳曰疆場之事慎守其一而備其不虞故守戍邊圉之臣不可以不論焉本傳贊

富珠哩阿隣罕原作孛術魯阿魯罕隆州伯爾克原作碧離葛山人

年八歲選習契丹字再選習女直字既壯為黃龍府路萬戶令史貞元二年試外路胥吏三百人補隨朝阿隣罕在第一補宗正府令史累擢尚書省令史布薩忠義討幹罕原作窩幹辟置幕府掌邊關文字甚見信任賊平阿隣罕招集散亡復業者萬人金史本傳大定二年忠義傳復從忠義伐宋屢入奏事論列可否上謂宰相曰阿隣罕所言可行者即行之宋人請和忠義使阿隣罕往和議定復入奏賜銀百兩重絹十端忠義薦阿隣罕有才幹可任尚書省都事詔以為大理司直未幾授尚書省都事除同知順天軍節度使赫舍

哩原作統
石烈

志甯北巡阿隣罕攝左右司郎中還朝再

遷侍御史上問赫舍哩良弼曰阿隣罕何如人也對

曰有幹才持心忠正出言不阿順數日遷勸農副使

兼同修國史侍御史如故改右司郎中奏請徙河南

戍軍屯營城中者於十里外從之遷吏部侍郎除山

東路統軍都監徙置河南八明安遷武勝節度使金史

本傳二十二年十一月充賀宋正旦使交聘表入為吏部

尚書改西南路招討使有司督本路明安人戶所貸

官粟阿隣罕乞俟豐年從之軍人以甲葉貿易諸物

天德權場及界外歲采銅礦或因私挾兵鐵與之市

易皆一禁絕之上番軍不許用親戚奴婢及傭僱者

營塹損圯以時葺治不與所部明安穆昆會宴故兵

民皆畏愛之上謂太尉守道曰阿隣罕及上京留守

完顏烏哩雅原作幹里也皆起身胥吏阿隣罕為人沈厚

其賢過之改陝西路統軍使兼京兆尹金史本傳二十八

年四月世宗紀召為參知政事金史本傳吏員入相止此一

人八字依詳校本增異數也宗室助傳先是陝西軍籍有關舊例

用子弟補充而材多不堪用阿隣罕於旗鼓手內選

補軍人以春牧馬經夏不收餉瘠弱多死阿隣罕命

以時收秣之春秋督閱軍士騎射以嚴武備終南採

涿者節其期限檢其出入以防奸細上謂宰相曰阿
隣罕所至稱治陝西政蹟尤著用之雖遲亦可得數
年力也命條上天德陝西行事上稱善以疾乞致仕

除北京留守卒金史本傳

布薩原作僕散揆本名臨喜其先上京人左丞相兼都元

帥沂國武莊公忠義之子也少以世胄選為近侍奉

御大定十五年尙韓國傳有大長字依詳校本削公主擢器物局

副使特授臨潢府路哈沙河原作赫沙阿世襲明安歷近

侍局副使尙衣局使拱衛直副都指揮使為殿前左

衛將軍金史本傳坐與外人竊議罷歸田里宏簡錄尋起為

灤州刺史改蠡州人為兵部侍郎大理卿刑部尙書

章宗即位出為泰定軍節度使改知臨洮府事以政

蹟聞升河南路統軍使陝西提刑司事揆剛直明斷

獄無冤滯禁戢家人百姓莫識其面積石洮二州舊

寇皆遁商旅得通於是進官一階仍詔褒諭金史本傳明

昌四年坐嘗稱鄭王永蹈免死除名宏簡錄未幾復五

品階起為同知崇義軍節度使事以戰功遷西北路

副招討進官七階賜金馬孟一銀二百兩重綵一十

端復以戰功升西南路招討使兼天德軍節度使賜

金五十兩重綵一十端復出禦邊轉戰出塞七百里

至齊呼勒圖原作赤胡覩地而還優詔褒諭遷一官仍許

其子安貞尙邢國長公主且許揆入謝禮成歸鎮會

韓國公主薨揆來赴上諭之曰北邊之事非卿不能

辦乃賜戰馬二即日遣還揆沿徼築壘穿塹連互九

百里營柵相望烽候相應人得恣田牧北邊遂甯復

以手詔褒諭且欲大用金史本傳承安四年二月章宗紀以

知興中府事赫舍哩原作統石烈子仁代之敕盡以方略

授子仁既入拜參知政事金史本傳四月請罷諸路提點

刑獄從之五月庚戌上諭宰臣曰諸路旱或關執政

今惟大興宛平兩縣不雨得非其守令之過與揆上

表待罪上令還職章宗紀改授中都路額特赫格們原作

胡土愛格鸞世襲明安進拜尙書右丞尋出經略邊事還

拜平章政事封濟國公泰和五年宋人渝盟以揆爲

宣撫河南軍民使上諭之曰朕卽位以來任宰相未

有如卿之久者若非君臣道合一體同心何以及此

先丞相亦嘗總師南邊效力先朝今復委卿諒無過

舉朕非好大喜功務要甯靜內外宋人屈服無復可

議若不知改可整兵渡淮埽蕩江左以繼爾先公之

功卽以尙廐名馬玉束帶內府重綵及御藥賜之揆

至汴蒐練軍士軍聲大振會天壽節特遣其子安貞

賜宴且命持白玉杯以飲揆及上秋獵以

史作所依
詳校本改

親獲鹿尾舌為賜

金史本傳

時宋殿帥郭倪濠州守將田

俊邁誘虹縣民蘇貴等為閒河南帥臣亦屢縱謀往

往利俊邁之賂反為遊說皆言宋之增戍本虞他盜

及聞行臺之建亦畏讐不敢去備且兵皆白丁自裹

糧糶窮蹙饑疫死者十二三由是中外信之宣撫司

以宋三省樞密院及盱眙軍謀來上又皆鑄點邊臣

為辭揆因請罷司從之又奏罷臨洮德順秦鞏新置

弓箭手

章宗紀

召揆還六年春宋人復數路來侵取泗

州取靈壁圍壽春命揆為左

史作右依
詳校本改

副元帥以討

之揆至軍前集諸將校告以朝廷弔伐之意分遣將

士禦敵復取臨淮蘄縣而符離壽春之圍亦解去敵

屢敗衄悉遁出境上即遣提點近侍局烏庫哩

原作烏古

論慶壽持手詔勞問征討事宜仍賜玉具劍一玉荷

連盞一金器一百兩重綵一十端尋復以詔褒諭賜

玉鞍勒馬二及玉具佩刀內府重綵御藥以旌其功

宋人既敗退上欲進討乃詔揆赴闕戒以師期宴於

慶和殿親諭之曰朕以趙擴背盟侵我疆場命卿措

畫曾未期月諸處累報大捷振我國威挫彼賊鋒皆

卿之力朕不能忘是日寵錫甚厚特收其次子甯壽

為奉御乃密授以成算俾還軍十月傳作十一月揆

依詳校本改

總大軍南伐分兵為九路進揆以行省兵三萬出潁

壽至淮宋人旅拒於水南揆密遣人測淮水惟八疊

灘可涉即遣鄂屯驤揚兵下蔡聲言欲渡宋帥何汝

礪姚公佐悉銳師屯花靨以備揆乃遣右翼都統完

顏薩布原作先鋒都統納喇原作邦烈潛渡八疊南

岸揆揮大軍直壓其陣敵不虞我卒至皆潰走自相

蹂踐死於水者不可勝計進奪潁口下安豐軍遂攻

合肥取滁州盡獲其軍實上遣使諭之曰前得卿奏

先鋒已奪潁口偏師又下安豐斬馘之數各以萬計

近又西帥奏捷棗陽光化既為我有樊城鄧城亦自

潰散又聞隨州闔城歸順山東之眾久圍楚州隴右

之師剋期出界卿提大兵攻合肥趙擴聞之料已破

膽失其神守度彼之計乞和為上昔嘗畫三事付卿

以今事勢計之徑渡長江亦其時矣淮南既為我有

際江為界理所宜然如使趙擴奉表稱臣歲增貢幣

縛送賊魁還所俘掠一如所諭亦可罷兵卿宜廣為

渡江之勢使彼有必死之憂從其所請而縱之僅得

餘息偷生豈敢復萌他慮卿於此時經營江北勞徠

安集除其虐政橫賦以良吏撫字疲民以精兵分守

要害雖未係趙擴之頸而朕前所畫三事上功已成矣前入見時已嘗議定今復諄諄者欲決卿成功爾機會難遇卿其勉之既而宋帥邱密果奉書乞和揆以前五事諭而遣之復進軍圍和州敵以騎萬五千駐六合揆偵知之卽以右翼掩擊斬首八千級進屯於瓦梁河以控眞揚諸路之衝乃整列軍騎畢張旗幟沿江上下皆金兵焉於是江表震恐宋眞州兵數萬保河橋復遣統軍赫舍哩子仁往攻之分軍涉淺潛出敵後敵見之大驚不戰而潰斬首二萬餘級生擒其帥劉佺常思敬蕭從德莫子容皆宋驍將也遂

下眞州宋復遣陳璧來告和揆以乞辭未誠徒欲綏師卻之宋人旣喪敗不獲請成乃決巨勝成公雷塘渚積水以爲阻盡焚其廬舍儲積過江遁去揆以方春地溼不可久留且欲休養士馬遂振旅而還次下蔡遇疾詔遣宣徽使李仁惠及其子甯壽引太醫診視仍遣中使撫問泰和七年薨訃聞上哀悼之輟朝遣使迎喪殯於都城之北百官會弔車駕臨奠哭之賻銀一千五百兩重幣五十端絹五百疋其葬祭物皆從官給諡曰武肅揆體剛內和與物無忤臨民有惠政其爲將也軍門鎮靜賞罰必行初渡淮卽命撤

去浮梁所至皆因糧於敵無餽運之勞未嘗輕用士卒而與之同甘苦人亦樂爲之用故南征北伐爲一

代名將云金史本傳子安貞甯壽

安貞本名阿海尙邢國長公主加駙馬都尉襲父明安歷官山東路安撫使以戰功遷徐州行樞密副使事貞祐四年尙書省奏其謀叛宣宗疑不實語平章英王守純覆案之質成其誣并其二子殺之以祖忠義父揆有大功免兄弟緣坐嘗言三世爲將道家所

忌至是果應宏簡錄安貞傳

宗浩字師孟本名老宏簡錄作老漢昭祖四世孫太保兼都

元帥漢國公昂之子也貞元中爲海陵入殿實達爾

原作小底世宗卽位遼陽昂遣宗浩馳賀世宗見之喜命

充符寶祇候大定二年冬昂以都元帥置幕山東宗浩領萬戶從行仍授山東東路兵馬都總管判官丁

父憂起復承襲伊綿烏爾袞原作因閔明安授河南

府判官以母喪解服闋授同知陝州防禦使事察廉能第一等進官一階升同知彰化軍節度使事累遷

同籤樞密院事改哈斯罕原作曷蘇館節度使世宗謂宰

臣曰宗浩有才幹可及者無幾二十三年徵爲大理卿踰年授山東路統軍使兼知益都府事陞辭世宗

諭之曰卿年尙少以卿近屬有治迹故以此授卿宜體朕意因賜金帶遣之金史本傳二十六年爲宋生日使

還授刑部尙書俄拜參知政事章宗卽位出爲北京

留守轉同判大睦親府事北方有警命佩金虎符發

上京等路軍萬人駐泰州便宜從事時以糧儲未備

且度敵未敢動遂分其軍就食隆肇間是冬果無警

宏簡錄北部光嘉喇原作廣吉刺者尤桀驚屢脅諸部入塞

宗浩請乘其春暮馬弱擊之時準布原作阻亦叛內族

襄行省事於北京詔議其事襄謂若攻破光嘉喇則

準布無東顧憂不若留之以牽其勢宗浩奏國家以

堂堂之勢不能掃滅小部願欲藉彼爲捍乎臣請先

破光嘉喇然後提兵北滅準布章再上從之詔諭宗

浩曰將征北部固卿之誠更宜加意毋致後悔宗浩

覘知哈達濟原作合底忻與博斯和原作婆速火等相結光嘉

喇之勢必分彼旣畏我見討而復掣肘仇敵則理必

求降可呼致也因遣主簿薩原作撒領軍二百爲先鋒

戒之曰光嘉喇降可就徵其兵以圖哈達濟仍覘餘

部所在速使來報大軍當進與汝擊破之必矣哈達

濟者與占楚瑋原作山只昆皆北方別部恃強中立無所

羈屬往來準布光嘉喇間連歲擾邊皆二部爲之也

薩入敵境光嘉喇果降遂徵其兵萬四千騎馳報以
待宗浩北進命人齎三十日糧報薩會於伊瑪原作伊米

河共擊敵而遣人誤入博斯和部由是東軍失期宗

浩前軍至特爾格原作忒里葛山遇占楚瑋所統舒嚕歡

塔原作石魯渾灘兩部擊走之斬首千二百級俘生口車畜

甚眾進至和碩原作呼歇水敵勢大蹙於是哈達濟部長

布古台原作白古帶占楚瑋部長呼巴拉原作胡必刺及博斯

和所遣和和原作和火者皆乞降宗浩承諾諭而釋之呼

巴拉言所部必里克圖原作必列土近在伊瑪河不肯偕

降乞討之乃移軍趨伊瑪與必里克圖遇擊之斬首

三百級赴水死者十四五獲牛羊萬二千車帳稱是

哈達濟等恐大軍至西渡伊瑪棄輜重遁去薩與光

嘉喇部長塔里瑋原作忒里虎追躡及之斡里雅布原作窰里

不水縱擊大破之博斯和九部斬首溺水死者四千

五百餘人獲駝馬牛羊不可勝計軍還博斯和乞內

屬并請置吏上優詔褒諭遷光祿大夫以所獲馬六

千置牧以處之明年宴賜東北部尋拜樞密使封榮

國公初朝廷置東北路招討司於泰州去境三百里

每敵入比出兵追襲敵已遁去至是奏徙之金山以

據要害設副招討二員分置左右由是敵不敢犯會

中都山東河北屯駐軍人地土不贍官田多爲民所
冒占命宗浩行省事詣諸道括籍凡得地三十餘萬
頃還坐以倡女自隨爲憲司所糾出知真定府事徙
西京留守復爲樞密使進拜尙書右丞相超授崇進
時懲北邊不甯議築壕壘以備守戍廷臣多異同平
章政事張萬公力言其不可宗浩獨謂便乃命宗浩
行省事以督其役功畢上賜詔褒賚甚厚薩里原作撒里
部長圖古勒原作陶括里入塞宗浩以兵追躡與布薩揆
軍合擊之殺獲甚眾敵遁去徵還入見優詔獎諭躡
遷儀同三司金史本傳賜玉束金器重幣宏簡錄進拜左丞

相宋人畔盟王師南伐會平章政事揆病乃命宗浩
兼都元帥往督進討宗浩馳至汴大張兵勢親赴襄
陽巡師而還宋人大懼乃命知樞密院張巖以書乞
和宗浩以辭旨未順卻之仍諭以稱臣割地縛送元
謀姦臣等事巖復遣方信孺齎其主趙擴誓書來且
言擴併發三使將賀天壽節及通謝仍報其祖母謝
氏殂致書於都元帥宗浩曰方信孺還遠貽報翰及
所承鈞旨仰見以生靈休息爲重曲示包容矜軫之
意聞命踴躍私竊自喜卽具奏聞備述大金皇帝天
覆地載之仁與都元帥海涵春育之德旋奉上旨亟

遣信使通謝宸庭仍先令信孺再詣行省以請定議
區區之愚實恃高明必蒙洞照重布本末幸垂聽焉
兵端之開雖本朝失於輕信然痛罪姦臣之蔽欺亦
不爲不早自去歲五月編竄鄧友龍六月又誅蘇師
旦等是時大國尙未嘗一出兵也本朝卽捐已得之
泗州諸軍屯於境外者盡令撤戍而南悔艾之誠於
茲可見惟是名分之論今昔事殊本朝皇帝本無佳
兵之意况關係至重又豈臣子所敢言江州之地恃
爲屏蔽倘如來諭何以爲國大朝所當念察至於首
事人鄧友龍等誤國之罪固無可逃若使執縛以送

是本朝不得自致其罰於臣下所有歲幣前書已增
大定所減之數此在上國初何足以爲重輕特欲藉
手以見謝過之實倘上國諒此至情物之多寡必不
深計矧惟兵興以來連歲割殘賦入屢蠲若又重取
於民是基元元無窮之困竊計大朝亦有所不忍也
於通謝禮幣之外別致微誠庶幾以此易彼其歸投
之人皆雀鼠偷生一時竄匿往往不知存亡本朝旣
無所用豈以去來爲意當隆興時固有大朝名族貴
將南來者洎和議之定亦嘗約各不取索况茲瑣瑣
誠何足云倘大朝必欲追求尙容拘刷至如泗州驅

掠人悉當護送歸業夫締新好者不念舊惡成大功者不較小利欲望力賜開陳捐棄前過闊略他事玉帛交馳歡好如初海內甯謐長無軍兵之事功烈昭宣德澤洋溢鼎彝所紀方冊所載垂之萬世豈有既乎重惟大金皇帝誕節將臨禮當修賀兼之本國多故又言合遣人使接續津發已具公移企望取接伏冀鑒其至再至三有加無已之誠亟踐請盟之諾卽底於成感戴恩德永永無極誓書副本慮往復遷延就以錄呈方信孺之來自以和議遂成輒自稱通謝使所參議官大定中宋人乞和以王抃爲通問使所

參議官信孺援以爲例宗浩怒其輕妄囚之以聞朝廷亦以爲行人而不能孚兩國之情將留之遣使問宗浩宗浩曰今信孺事旣未集自知還必得罪拘之適使他日有以藉口不若數其佻易而釋遣之使歸自窮無辭以白其國人則擴侂冑必擇謹厚者來矣於是遣之而復張巖書曰方信孺重以書來詳味其辭於請和之意雖若婉遜而所畫之事猶未悉從惟言當還泗州等驅掠而已至於責貢幣則欲以舊數爲增追叛亡則欲以橫恩爲例而稱臣割地縛送姦臣三事則並飾虛說弗肯如約豈以爲朝廷過求有

不可從將度德量力足以背城借一與我軍角一日
勝負者哉以下依宏簡錄節本乃者帥府奉命征討未及出師
姑以逐處隨宜捍禦所向摧破旋卽底平爰及泗州
不勞而復今乃自謂捐其已得斂軍撤戍以爲悔過
之效是豈誠實之言據陝西宣撫司申報今夏宋人
犯邊者十餘次並爲我軍擊退梟斬捕獲蓋以億計
然則所來請和其理安在又言名分之論今昔事殊
者蓋大定之初失在正隆致南服不定故特施大恩
易爲姪國以鎮撫之今以小犯大曲在於彼旣以絕
大定之好則復舊稱臣於理爲宜若以爲非臣子所

敢言豈皇統時獨敢言哉又謂江外之地將爲屏蔽
夫藩籬之固當守信義如不務此雖長江之險亦不
可恃何況區區兩淮之地乎昔江左六朝之時淮南
屢嘗屬於中國至後周顯德間南唐李璟獻廬舒斬
黃畫江爲界亦皆能爲國今信孺齎到誓書乃云疆
界並依大國皇統與彼隆興年已畫爲定若是則不
言割彼之地翻欲得我之已有者豈理也哉又通謝
禮幣之外別備錢一百萬貫折金銀各三萬兩專以
塞再增幣之責及歲幣添五萬兩正其言無可準止
是復皇統舊額而已安得爲增欽奉聖訓昔宣靖之

際棄信背盟我師問罪嘗割三鎮以乞和今既無故
興戎茂棄信誓雖盡獻江淮之地猶不足以自贖况
彼國嘗自言叔父姪子與君臣父子略不相遠如能
依舊稱臣卽許以江淮之間取中爲界如欲世爲子
國卽當盡割淮南直以大江爲界陝西邊面並以大
軍已占爲定據元謀姦臣必使縛送緣彼欲自致其
罰可令函首以獻歲幣亦更添五萬兩疋以表悔謝
之責方信孺言語反覆不足取信如李大性朱致和
李璧吳瑄輩似乎忠實可遣詣軍前稟議據信孺之
罪過於胡昉自古兵交使人容在其間姑放令回報

其後宋人竟請以叔爲伯增歲幣備犒軍銀函姦臣
韓侂胄蘇師旦首以獻而乞盟焉宏簡錄泰和七年九

月薨於汴訃聞上震悼輟朝命其子宿直將軍天下
奴奔赴喪所仍命葬畢持繪像至都將親臨奠以南

京副留守張巖叟爲敕祭兼發引使莒州刺史鈕祐
祿布格蘇原作女奚
列字葛速爲敕葬使仍摘軍前武士及旗

鼓笛角五十人并隨行親屬官員親軍送至葬所賻
贈甚厚諡曰通敏金史
本傳

瓜爾佳清臣本名阿卜薩原作阿
卜沙呼爾哈原作胡
里改路

罕都原作
桓篤人姿狀雄偉善騎射皇統八年襲祖布達

原作明安大定元年閏世宗即位率本部軍六千赴

中都會之以功遷昭武大將軍金史本傳為元帥志甯管

押萬戶接應左都監完顏思敬逐斡罕原作餘黨敗

之柔遠前至茂巴勒達原作抹拔里達之地悉擒之賊平遷

鎮國上將軍知頴順軍事三年五月從志甯復取宿

州捷聞授宿州防禦使移博州改西北路招討都監

遷烏爾古實壘原作烏古十壘部族節度使宏簡錄十二年授

右副都點檢使宋還三字依世宗紀增遷左副都點檢出為

陝西路統軍使兼知京兆府事朝辭賜金帶廐馬仍

諭之曰卿典禁兵日侍左右勤勞久矣故以是授卿

宜益思勉二十六年改西京留守閱三歲遷樞密副

使金史本傳明昌元年立其女為昭儀眷倚益重二年拜

尙書左丞頃之進平章政事封芮國公四年遷右丞

相監修國史時議籤軍戍邊上問漢人與夏人孰勇

對曰漢人勇上曰何元昊擾邊宋終不能制對曰宋

馭軍法不可得知今西南路人殊勝於彼未幾遷崇

進改封戴國公人有以八陣圖來上者上問朕嘗觀

宋白所集武經其載攻守之法亦多難行對曰兵書

皆定法難以應變本朝行兵之術惟用正奇二軍臨

敵制變以正為奇以奇為正故無往不克上曰自古

用兵亦不出奇正二法耳且學古兵法如學奕棋未能自得於心而欲用舊陣勢以接敵亦已疎矣尋以母老許賜告歸省五年二月省覲還謁上御凝和殿問卿母健否其壽幾何別相幾許對曰年八十三別十年幸頗強健上曰何不來此曰急於家務故不欲離耳上曰老人多如是復問呼爾哈路風俗何如對曰視舊則稍知禮貌而勇勁不及因言西南西北等路軍人其閑習弓矢亦非復曩時宏簡錄六年遷儀同三司進拜左丞相改封密受命出師行尙書省事於臨潢府清臣遣人偵敵虛實以輕騎八千令宣徽使

伊喇敏

原作移刺敏

爲都統左衛將軍充招討使完顏安

國爲左右翼分領前隊自選精兵一萬以當後隊進至哈里

原作合勒

河前隊敏等於栲栳灤攻營十四下之

回迎大軍屬部色撤

原作斜出

掩其所獲牛羊資物以歸

清臣責其賅罰北準布

原作阻鞞

由此叛去大侵掠上遣

責清臣命右丞相襄代之承安五年降授橫海軍節度使兼滄州管內觀察使

金史本傳

尋致仕泰和二年薨

年七十子雅齊堪

原作么查刺

襲明安

宏簡錄

初議征討清

臣主其事既而領軍出征雖屢獲捷而貪小利遂致北邊不甯者數歲天下尤之

金史本傳

完顏薩布原作始祖弟博和哩原作保之後也狀貌

魁偉沈厚有大略初補親衛軍章宗時選充護衛明

昌元年八月由宿直將軍為甯邊傳作甯化依州刺

史未幾遷武衛軍副都指揮使泰和二年轉呼爾哈

原作胡路節度使四年升武衛軍都指揮使尋為殿

前左副都點檢從布薩原作揆伐宋為右翼都統六

年六月宋將皇甫斌遣王統制三字依詳率步騎數

萬由確山褒信分路侵蔡金史聞郭倬李爽敗阻溱

水不敢進揆遣薩布等以騎七千往擊之會溱水漲

宋兵扼橋以拒薩布等潛師夜出溱州刺史完顏達

希布原作達以騎涉水出其右副統尙廐局使布希

萬努原作蒲等出其左率副統阿嚕岱原作阿以精

兵直趨橋宋兵不能扼比明大潰萬努以兵斷真陽

路諸軍追擊至陳澤斬首二萬級獲戰馬雜畜千餘

兵還進爵一級厚賜金幣貞祐初拜同簽樞密院事

三年遷知臨洮府事兼陝西路副統軍召見諭曰卿

向在西京盡心為國及治華州亦嘗宣力今以陝西

安撫使烏庫哩揚珠原作烏古不遵安撫使達希布

節制多致敗事已責罰揚珠命卿副之宜益盡心八

月轉知鳳翔府事兼本路兵馬都總管俄為元帥右

都監遣提控實嘉原作石盞合喜楊幹烈等大敗夏人於

定西獻捷京師命行省閱視其功賞之四年四月調

兵拔宋木陡關斬首千級五月遣兵焚來羌城界河

橋俘馘甚多八月夏人寇結耶鶻川復擊走之尋又

破其眾於車兒堡興定元年二月轉簽樞密院事宏簡

錄時上以宋歲幣不至且復侵盜詔薩布討之四月

與宋人戰於信陽斬首八千生擒統制周光獲馬數

千牛羊五百又遇宋人於隴山七里山等處前後六

戰斬獲甚眾尋遣兵渡淮略中渡店拔光山羅山定

城等縣破光州兩關斬首萬餘獲馬牛及布分給將

士詔賜玉兔鶻一內府重幣十端七月上章言京都

天下之根本其城池宜極高深今外城雖堅然周六

十餘里倉卒有警難於拒守竊見城中有子城故基

宜於農隙築而新之為國家久長之利及凡河南陝

西州府皆乞量修從之二年正月破宋人於鐵山及

上石店唐縣四月進兼西南等路招討使西安軍節

度使陝州管內觀察使奉詔攻棗陽宋出兵三萬拒

戰稍誘擊之宋兵敗走城薄諸濠殺及溺死者三千

餘人遂進兵圍之宋騎兵千步卒萬來援逆戰復大

敗之七月遷行山東西路兵馬都總管兼武甯軍節

度使三年二月奪宋白石關殺其守者千餘人獲鎧仗千計三月破宋兵於七口倉又奪宋小鵲倉獲糧九千石兵仗三十餘萬是月復敗宋兵三千於石鵲崖四年三月奉詔出兵河北招降晉安權府事皇甫珪正平縣令席永堅率五千餘人來歸得糧萬石時河北所在義軍官民堅守堡寨力戰破敵者眾薩布上章言此類忠亦可嘉若不旌酬無以激人心乞朝廷量加官賞萬一敵兵復來將爭先效用矣上覽奏召樞密官曰朕與卿等亦嘗有此議以不見彼中事勢故一聽帥臣規畫今觀此奏甚稱朕意其令有司

遷賞之是年四月遷樞密副使五年五月奉詔引兵救河東戰屢捷復晉安平陽二城監察御史言其不能檢束士眾縱之虜略請正其罪上以有功詔勿問金史本傳御史納蘭又言其姪唐州守將訛論與宋人戰亦敗反以捷聞上皆不之罪獨稱納蘭敢言錄功付有司秩滿考最元光二年五月復河中正大元年五月拜平章政事未幾轉尙書右丞相封莘國公四字依詳校本雅與參知政事李蹊相得及蹊以公罪出尹京洛薩布數薦蹊比唐魏徵以故蹊得復相三年將禘祭爲大禮使議配享宣宗功臣論者紛紜上言丞相

福興死王事齊勤

原作七斤

謹守河南以迎大駕功宜配

享議遂定四年吏部郎中楊居仁上封事言宰相宜

擇人上語大臣相府非其人御史諫官當言彼吏曹

何與於此尙書左丞延扎舒嚕

原作顏蓋世魯

素嫉居仁附

和上議薩布徐進曰天下有道庶人猶得獻言况在

郎官陛下有寬宏之德故不當言者猶言使其言可

用則行之不可用不必示臣下也上是之

宏簡錄

五年

行尙書省於京兆謂都事商衡曰古來宰相必用文

人以其知爲相之道薩布何知吾恐他日史官書之

某時以某爲相而國乃亡卽促衡草表乞致仕

金史本傳

天興元年兵事急命宰執都堂會議平章政事侯摯

以國勢不支因論數事曰只是更無孽畫博索

原作白撒

怒曰平章出此言國家何望耶意在置之不測薩布

顧謂博索曰侯相言甚當博索遂含憤而罷時元兵

薄汴博索策後日講和或出質必首相當行力請薩

布領省事拜爲左丞相尋復致仕哀宗遷歸德復起

爲右丞相樞密使兼元帥封壽國公扈從以行河北

兵潰從至歸德又請致仕二年六月復詔行徐州尙

書省事既至以州乏糧遣郎中王萬慶會徐宿靈壁

兵取源州令元帥郭恩統之九月恩至源州城下敗

績而還再令卓翼攻豐縣破之初恩以敗為恥託疾
不行乃密與河北諸叛將郭野驢輩謀歸國用安執
元帥商瑀父子及元帥左都監赫舍哩算卓原作紘石烈善
住併殺之又逐都尉額哲埒訥原作幹轉留奴尼瑪哈原作泥龐
古和勒端原作桓端富察原作蒲察世謀元帥右都監李居仁
員外郎常忠自是防城與守門者皆河北義軍出入
自恣薩布先病疽久不視事重為賊黨所制束手聽
命而已時蔡已被圍朝命阻絕且逼大兵徐州將士
皆議出降薩布不從乃授郭野驢徐州節度副使兼
防城都總領以羈縻之野驢見徐州空虛復約源州

叛將麻琮內外相應十月甲申詰旦襲破徐州薩布
自縊於州第琮乃以州降元宏簡錄薩布臨陣對壘既
有將略洎兼鈞衡殊有相度晚以老病受制叛臣致
修匹夫之節此猶大廈將傾非一木所能支也悲夫

金史本傳

特嘉烏新原作赤蓋尉忻字大用上京人當襲其父穆昆不

願就中明昌五年策論進士第選為尙書省令史吏
部主事監察御史言諸王駙馬至京師私買諸物有
詔禁止遷鎮南軍節度副使息州刺史耕鞠場種禾
兩禾合穗進於朝特詔褒諭改丹州遷鄭州防禦使

權許州統軍使丞相高汝礪嘗薦其才可任宰相元光二年正月召爲戶部侍郎未幾權參知政事二月爲戶部尙書權職如故三月拜參知政事兼修國史詔諭近臣曰烏新資秉純質事可倚任且其性孝朕今相之國家必有望汝輩當效之也正大元年五月拜尙書右丞哀宗欲修宮室烏新極諫而止至以臥薪嘗膽爲言上悚然從之同判睦親府內族薩哈連原作撒合輦交結中外久在禁近哀宗爲太子有定策功由是倚任日深臺諫每以爲言太后嘗戒敕曰上之騎鞠舉樂皆汝教之再犯必杖汝哀宗終不能去烏

新諫曰薩哈連姦諛之最日在天子左右非社稷福

出爲中京留守朝論快之五年致仕居汴中崔立之

變明日召家人付以後事望睢陽慟哭以弓弦自縊

而死年六十三一子名棟齊原作董七沒於兵閒弟秉甫

字正之烏新天資忠亮在治世足爲良臣不幸仕亂

離之朝以得死爲願哀哉

金史本傳

完顏仲德本名呼沙呼

原作忽斜虎

海蘭

原作曷懶

路人少穎

悟不羣讀書習策論有文武才初試補親衛軍雖備宿衛而學業不輟中泰和三年進士第歷仕州縣貞祐用兵辟充軍職嘗爲元兵所俘不踰年盡解其語

尋率諸降人萬餘來歸宣宗召見奇之授邳州刺史兼從宜增築城壁匯水環之州由是可守哀宗卽位遙授同知歸德府事同簽樞密院事行院於徐州徐州城東西北三面皆黃河而南獨平陸仲德壘石爲基增城之半復浚湟引水爲固民賴以安正大五年詔關陝以南行元帥府事以備小關及扇車回時北兵叩關適與前帥鄂屯阿里布原作奧屯酌酒更代而兵猝至金史本傳遂越關而東殺守者數百大金志阿里布素無守禦之策爲有司所劾罪當死仲德上書引咎謂北兵越關之際符印已交安得罪歸前帥臣請

受戮上義之止杖阿里布而貰其死六年移知鞏昌府兼行總帥府事時陝西諸郡已殘仲德招集散亡得軍數萬依山爲柵屯田積穀人多歸焉一方獨得小康號令明肅至路不拾遺八年四月詔授仲德鞏昌行省及虎符銀印天興元年九月拜工部尙書參知政事行尙書省事於陝州時烏登原作兀典新敗陝州殘破仲德復立山寨安撫軍民會上以蠟丸書徵諸道兵入援諸路皆觀望不進或中道遇兵而潰惟仲德提孤軍千人歷秦藍商鄧擷果菜爲食閒關百死轉戰而前來援京師八字依大金志至汴之日適上東遷仲

德妻子在京師五年矣不入其家趨見上於宋門問
東幸之意知欲北渡力諫云北兵在河南而上遠徇
河北萬一無功得完歸乎國之存亡在此一舉願加
審察臣嘗屢遣人奏秦鞏之間山巖深固糧餉豐贍
不若西幸依險固以居命帥臣分道出戰然後進取
興元經略巴蜀此萬全策也上已與博索原作白撒議定
金史本傳仲德持御馬銜苦諫博索傳不從然素重仲德且
嘉其赴難進拜尙書省右丞兼樞密副使軍次黃陵
岡二年正月車駕至歸德以仲德行尙書省於徐州
既至遣人與國用安通問沛縣卓翼孫壁冲者初投

用安用安封翼爲東平郡王壁冲博平公升沛縣爲

源州已而壁冲來歸仲德畀之舊職合統河北諸砦

行源州帥府事金史本傳徐守王德全心畏仲德用安累

檄德全入援不赴仲德至徐德全益恐遣人納奏求

赴歸德仲德留之不遣云徐州重地德全不宜離鎮

仲德虛州廨不居亦無兵衛日以觀書爲事德全自

疑益甚宏簡錄二月魚山總領張璪作亂殺元帥完顏

呼圖原作胡土降北仲德累議討之德全不從卽領麾下

十許人親勸民兵得三百人徑往魚山而從宜嚴祿

已誅璪反正仲德撫慰軍民而還有曹總領者盜御

馬東行詔諭行省討之仲德既殺賊德全欲功出於已復殺曹黨四十餘人三月阿勒楚爾原作阿木魯攻蕭

縣遊騎至徐德全馬悉為所邀以失馬故始議救蕭

遣張元格苗秀昌率騎八百以往未及交戰元格退

走元兵掩之蕭縣遂破四月仲德陽以關糧往邳州

州官出迎就執德全并其子殺之餘黨之外一無所

問闔郡稱快金史本傳五月詔赴行在官屬以官努原作官奴

為亂懼為所給勸勿往果得其詐六月詔議遷蔡仲

德雅欲奉上西幸因贊成之至蔡領省院事無鉅細

率親為之選士括馬繕治甲兵志甚堅銳會近侍左

右久困睢陽今幸即安皆娶妻營業不願遷徙日夕

為上言西行不便仲德每深居燕坐瞑目太息以不

得西遷為恨及上命有司修見山亭同知衙為游息

之所仲德諫曰自古人君遭難播越必痛自貶損務

求克復舊物况今諸郡殘破保完者獨此一方其公

廨何敢望宮闕萬一方之野處露宿則有加矣切恐

遠近聞之人心解弛不足以濟大事上遽命止之扈

從諸人苟一時之安以為可守故上無他意會忠孝

軍提控李德十餘人乘馬入省大呼月糧不優仲德

大怒縛德堂下杖之六十上諭以此軍得力方欲倚

用卿可加容忍對曰時方多故故錄功隱過自陛下
之德至於將帥之職則不然小犯則決大犯則誅強
兵悍卒不可使一日不在紀律軍士聞之至於國亡
不敢有犯初有司定減軍糧人大怨望上聞之欲分
軍爲三上軍月給八斗中七斗下六斗復怨不均仲
德謀立射格自是上中軍輒多獲人益爲勸九月庚
戌朔蔡城戒嚴甲子分軍防守四面丁男皆乘城宏簡
錄仲德妻尙在汴聞崔立之變自毀其容服携妾及
二子走蔡語仲德曰事勢至此丈夫能爲國出力婦
人獨不能耶因率諸命婦自爲一軍親運矢石於城

下城中婦女爭出繼之

仲德妻傳

仲德守蔡營畫禦備未

嘗一至其家拊存將士務得其歡心將校有戰亡者

親臨賻祭哭之盡哀

金史本傳

十月壬申朔元兵濠壘成

耀兵城下旌旗蔽天城中駭懼及暮焚四關夷其牆
而退十一月宋遣襄陽太尉江海棗陽尉孟珙以兵
萬人助元軍耀於城南且以箭射書入城中招諭居
民仲德得之投於水中十二月辛丑元兵以攻具備
城仲德日以國家恩澤君臣分義親諭軍民軍民感
泣人百其勇固志防守大金國志已丑西城破城中前期
爲備不能入但於城上立柵兩軍相去僅百餘步仲

德摘三面精銳日夕禦戰終不能拔三年正月庚子朔元兵以正旦會飲鼓吹相接城中飢窘愁歎而已時四帥三都尉已戰沒餘總帥以下盡出禁近至舍人脾印省部掾屬亦皆供役戊申元兵鑿西城爲五門整軍以入督軍慶戰及暮乃退來日復集已酉仲德率精兵一千巷戰宏簡錄自卯及巳俄見子城火起聞上自縊謂將士曰吾君已崩吾何以戰爲吾不能死亂兵之手吾赴汝水從吾君矣諸君其善爲計言訖赴汝水死金史本傳妻亦自盡仲德妻傳將士皆曰相公能死吾輩獨不能耶於是參政富珠哩羅索原作李木魯婁室

烏凌阿呼圖原作烏林答胡土總帥元志赫舍哩柏壽烏庫

哩和勒端及軍士五百餘人皆從死焉仲德貌不踰常人平生喜怒未嘗妄發聞人過嘗諱護之雖在軍旅手不釋卷門生故吏每以名分教之家貧做衣糲食終其身晏如也雅好賓客及薦舉人材人有寸長極口稱道其掌軍務賞罰明信號令嚴整故所至軍民爲用危急死生之際無一士有異志者南渡以後將相文武忠亮始終無瑕仲德一人而已金史本傳

吉林通志卷八十五

人物志十四 金十三

實嘉努

費摩達

唐古德温

烏庫哩尼瑪哈

富察鼎壽

圖克坦繹

烏庫哩元忠

吳璋

完顏懷德

夾谷土刺

華沙布

特庫

布古德

納喇綽奇

舒穆魯元毅

伯特梅和尙

烏克遜温屯

富察羅索

圖們色塔默

烏雅威赫

烏雅恩徹亨

珠嘉托羅海

實嘉努

原作石家奴

富察

原作蒲察

部人世居按春

原作案出虎

水

祖和勒端

原作斛魯短

世祖外孫也和諾克

原作桓赫

薩克達

原作散達

之亂昭肅皇后父母兄弟皆在敵境和勒端以

計迎還之實嘉努自幼撫養於太祖家及長以女妻

之年十五從攻寧江州敗遼主親軍攻臨潢府皆有

功襲穆昆其後自山西護齊國公

傳作王依摩羅歡詳校本

原作謀良虎

之喪歸上京道由興中是時方攻興中未下

實嘉努置柩於驛率其所領明安兵助王師遂破其

城從宗望討張覺再從宗翰伐宋聞宗望軍已困汴

遣往計事抵平定軍遇敵兵數萬敗之遂見宗望還

報宗翰甚嘉之明年復伐宋隸羅索

原作婁室

軍討陝西

未下實嘉努領所部兵援之既而以本部屯戍西京

會契丹達實

原作大石

出奔以伊都

原作余睹

為元帥實嘉努

為副襲諸部族以還未幾有疾退居鄉里天眷中授

侍中駙馬都尉再以都統定邊部熙宗賜御書嘉獎

之封蘭陵郡王除東京留守以病致仕卒年六十三

加贈鄖王正隆例奪王爵封魯國公

金史本傳

大定閒定

亞次功臣圖像衍慶宮

十三字依詳校本增

費摩達

原作裴滿達

本名呼達

原作忽撻

博勒和

原作盧火

部人

為人孝友天輔六年從普嘉努

原作蒲家奴

追叛寇於德

里川力戰有功熙宗娶呼達女是為悼平皇后天眷

元年授世襲明安以皇后父拜太尉封徐國公皇統

元年除會甯牧居數歲以太尉奉朝請九年悼后死

無何海陵弒熙宗欲邀眾譽揚熙宗過惡以悼后死

非罪於是封呼達為王天德三年薨子呼敦

原作忽都為

中京留守

史作燕京依詳校本改

以罪免居中都海陵命馳驛

赴之及葬使祕書監納哈塔

原作納合

椿年致祭賻銀五

百兩

金史本傳

唐古德溫本名阿里上京刷

原作率

河人也曾祖實庫

原作石古

從太祖平拉必瑪察

原作醅麻產

領穆昆祖特伯烈

原作李魯

嗣職從伐遼攻甯江州泰州有功父達蘭

原作

懶尙康宗女從宗望收平州至城東十里許遇敵兵

甚眾戰敗之賞賚甚厚授行軍明安皇統初遷龍武

衛上將軍歷興平臨海等軍節度使德溫善射尙睿

宗女楚國長公主天眷三年授宣武將軍皇統元年

從宗弼南征以善突戰遷廣威將軍六年遷定遠大

將軍七年授殿前右副都點檢天德初改殿前左副

都點檢遷兵部尚書出為大名尹兼本路兵馬都總
管改橫海軍節度使延平尹兼鄜延路兵馬都總管
世宗即位封道國公為殿前都點檢駙馬都尉大定
二年以父祖功授按春原作按出虎明安所管世襲穆昆
三年九月九日世宗以故事出獵謂德温曰扈從軍
士二千人飲食芻秣能無擾百姓乎嚴為約束仍以
錢一萬貫分給之四年為勸農使出為西京留守賜
犀弓玉帶召入為皇太子太傅卒上輟朝臨奠賻祭
甚厚十八年追錄其父達蘭并德温前後功授其長
子駙馬都尉鼎世襲西北路摩哩原作沒里山明安徒隸

泰州金史本傳

烏庫哩尼瑪哈原作烏古論粘沒曷一作忠弼宋史上京和倫原作

胡刺屯人也移屯河間祖和勒端原作喚端太祖伐遼常

侍左右追遼主延禧卻夏人援兵皆有功授世襲穆

昆父罕都原作歡觀官至廣威將軍尼瑪哈尚睿宗女冀

國長公主初為護衛天德二年襲穆昆海陵伐宋為

押軍明安世宗即位軍還授侍衛親軍步軍都指揮

使加駙馬都尉為右副點檢使宋七字依交聘表增歷左副

點檢遷右宣徽使勸農使為興平軍節度使改廣甯

尹賜錢三千貫至廣甯嗜酒不視事上以兵部員外

郎宗安爲少尹詔宗安戒諭之大定中卒上聞之遣
其子駙馬都尉公說馳驛奔喪賜錢三千貫沿路祭
物並從官給金史本傳

富察原作蒲察鼎壽本名和尚上京和碩原作曷速河人欽懷

皇后父也金史本傳祖太神國初有功累階光祿大夫贈

司空應國公父阿胡迭尙海陵女弟慶宜公主官至

特進贈司徒譙國公弘簡錄鼎壽賦性沈厚有明鑒通

契丹漢字長於吏事尙熙宗女鄭國公主金史本傳授駙

馬都尉貞元三年加定遠大將軍爲尙衣局使累官

器物局使大定二年由符寶郎出爲蠡州刺史濬州

防禦使有惠政兩州百姓刻石紀之遷泰甯軍節度

使歷東平府橫海軍入爲右宣徽使改左宣徽使金史

本傳使宋還世宗紀授中都路溫圖瑁原作昏得渾山明安和

碩穆丹原作木單世襲穆昆改河間尹號令必行豪右屏

跡有宗室居河間侵削居民鼎壽奏徙其族於平州

郡內大治卒官上聞之深加悼惜喪至香山皇太子

往奠百官致祭賻銀絲絹明昌三年以皇后父贈太

尉越國公宏簡錄鼎壽既世連姻戚女爲皇后長子希

卜蘇原作蘇不失凡三尙定國景國道國公主其寵遇如

此未嘗以富貴驕人當時以爲世戚之冠云金史本傳

圖克坦原作徒單本名珠巴克原作木輩其先上京阿勒

楚喀達原作按出人祖薩噶爾瑪克原作撒合懣國初有

功授黃龍傳作隆安依詳校本改府路哈濟原作合扎穆昆多科阿

林原作奪明安原作奪繹美姿儀通諸國語尙熙宗弟七女

藩國公主充符寶祇候遷御院通進授符寶郎歷宣

德泰安淄州刺史有廉名改同知廣甯府事以母鄂

國公主憂不出世宗特許以憂制中襲父封服闋授

同知濟南府事二十六年遷棣州防禦使以政迹聞

升臨海軍節度使卒繹家世貴寵自曾祖照至繹尙

公主者凡四世云金史本傳

烏庫哩元忠原作烏古論元忠本名額哩頁原作額里也其先上

京特卜庫原作獨人父額琳原作訛論尙太祖女畢國公

主元忠幼秀異世宗在潛邸以長女妻之後封魯國

大長公主正隆末從海陵南伐世宗即位遼陽時太

保昂遣元忠朝於行在遂授定遠大將軍擢符寶郎

諭之曰朕初即位親密無如汝者侍從宿衛宜戒不

虞大定二年加駙馬都尉除近侍局使遷殿前左衛

將軍從世宗獵上欲射虎元忠諫止之進殿前右副

都點檢爲賀宋正旦使還轉左副都點檢坐家奴結

攬民稅免官十一年復舊職明年升都點檢十五年

北邊進獻命元忠往受之及還詔諭曰朕每遇卿直宿其寢必安今夏幸景明宮卿去久朕甚思之會大興府守臣闕遂以元忠知府事有僧犯法吏捕得置獄皇姑梁國大長公主屬使釋之元忠不聽主奏其事世宗召謂曰卿不徇情甚可嘉也治京如此朕復何憂秩滿授吏部尙書以其子誼尙顯宗薛國公主十八年擢御史大夫授薩巴原作撒巴山世襲穆昆世宗問左丞相赫舍哩原作紇石烈良弼孰可相者良弼以元忠對乃拜平章政事封任國公進尙書右丞相策論進士之科設元忠贊成之金史本傳會詔葬元妃李氏於

海王莊元忠提控葬事都水監丞高杲壽治道路不

如式元忠不奏決之四十御史大夫張景仁劾奏元

忠輒斷六品官無人臣禮使富察原作蒲察鼎壽傳詔戒

敕張景仁傳世宗將幸會甯元忠進諫不聽出知真定府

尋復詔爲右丞相世宗欲燬上京城元忠曰此邦遭

正隆軍興百姓凋弊陛下休養二十餘年尙未完復

况土性疏惡燬之恐難經久風雨摧殘歲歲繕完民

將益困矣金史本傳二十四年三月世宗紀駕東幸金史本傳五

月乙丑至上京二十五年四月丁丑宴宗室宗婦於

皇武殿元忠率羣臣宗戚捧觴上壽皆稱萬歲上歌

本曲道王業之艱難繼述之不易至一鼓乃罷世宗紀

久之未還元忠奏曰鑾輿駐此已閱歲倉儲日少市

買漸貴禁衛暨諸局署多逃者有司捕寘諸法恐傷

陛下仁愛世宗嘉納之金史本傳坐與布薩原作僕散揆等燕

集竊議宗道以聞宗道傳出為北京留守責諭之曰汝

強悍自用覬權而結近密汝心叵測其速之官後左

丞張汝弼奏事世宗惡其阿順謂左右曰卿等每事

依違苟避不肯盡言高爵厚祿何以勝任如烏庫哩

元忠為相剛直敢言義不顧身誠可尚也於是改知

真定府事移知河間明昌二年以河間修築毬場擾

民會赦下除順義軍節度使乞致仕不許特加開府

儀同三司北京留守徙知濟南府過闕令預宴班平

章政事之上承安二年移守南京尋改知彰德府卒

訃聞上遣宣徽使白琬燒飯賻物甚厚元忠素貴性

粗豪而內深忌世宗嘗責之又所至不能戢奴僕世

以此為訾云子誼金史本傳

吳璋字器玉石晉末有官獻州從少帝北行者又自

遼陽遷泰州其子孫遂為長春人六世祖匡嗣遼開

府儀同三司同中書門下平章事陳國公祖鐸閣門

祇候金天會中左班殿直父德元貞元中監崞縣煙

火公事贈明威將軍璋生七歲而孤養於其姑樂亭齊氏稍長卽能自樹立大定十年以蔭補官歷遂城滿城四務酒官明昌四年調保州軍器庫使改太原大備倉副使泰和初以六品諸司差監歷城稅課最遷濟南軍資庫副使轉鄧州草場副使會錄事員缺父老狀於州請璋攝司事不期月政成郡人以吏能稱焉衛紹王卽位用大安霈恩官顯武將軍騎都尉濮陽縣男食邑三百戶因爲所親言吾猥以賞延入仕將四十年得不償勞甯不自知徒以先君子蚤世不及通顯故強顏末秩耳今品及列爵當豫追錫之

與生平之志畢矣今不自止欲何求邪乃投牒請老武勝節度高侯雅知璋勸止之曰選法廕子五品例入一差隨有超擢君淹筦庫久能少忍之且當被百呈之命何求去之決邪不得已超調得監方城稅到官不數日以崇慶元年五月終於官舍年六十五璋資孝友姑氏沒哀過所生爲人誠實樂易重然諾輕施予有以緩急來歸者必極力營贍之以故家屢貧然不卹也歿之日識與不識皆爲之嗟惜名士赴弔者數十人子二仲侃忠顯校尉仲傑鄧州教授元好問遺

山集二
十九

完顏懷德字輔之以小字得孫行隸上京路司屬司武元文烈之從弟劾徹封國於趙子斜不出降國而郡封於金源子阿魯熙宗朝平章政事子習捏驃騎尉上將軍義州節度副使懷德其子也甫成童以宗子第五從承應走馬局俄遷內承奉班三厯監務用調密州倉使衛紹王至甯元年選注臨淄令懷德生長華腴而能以法度自檢初到官吏民畏其修整謂不可測及見其不飲酒不畏怒不事苛細不以榜掠立威不三數日上下歡然貞祐二年受代有期而中夏被兵盜賊充斥互爲支黨眾至數十萬攻下郡邑

官軍不能制渠帥岸然以名號自居讎撥地之酷睚眦種人期必殺而後已若營壘若散居若僑寓託宿羣不逞鬪起而攻之尋蹤捕影不遺餘力不三二日屠戮淨盡無復噍類至於發掘墳墓蕩棄骸骨在所悉然獨臨淄之民感令之仁視猶血屬百方藏匿有以合家父子甘就死地者人心既定確然不移其掩蔽愈更深固如是數月之久大帥駙馬都尉僕散某統兵而東乃詣軍自陳僕散知懷德仁愛所感脫身於萬死不一生之地承制拜官懷德南歸之志已決再四退讓乃聽自便是後僑寓亳州宣宗興定五年

終年六十子從政奉道課稅所副使

同上

夾谷士刺字大用世爲合懶路人曾祖息虎天會初嘗以王會握兵柄祖僕干驃騎尉上將軍父阿海驃騎尉上將軍澄州刺史士刺弱冠始知讀書三舉策論進士以泰和三年登科歷撫甯海濱簿貞祐初被召道出平州平州適被兵州將請充軍中彈壓以功陞一階入補省掾終更除武甯軍節度副使五年用樞密院薦充京東總帥府經歷司主帥牙古大資驚很恃功自高奴視參佐往往置之死地從事輩畏之惟意所嚮噤不出一語士刺直前徑行無所顧藉論

事之際極所欲言者而止少不見則移疾不爲出帥悔悟或詣謝之其秉志抗直如此興定初宋人步騎數萬侵泗州聲勢甚張士刺爲畫策潛軍趨靈壁出其不意殺獲甚眾以功遷兩階四年召爲戶部員外郎轉刑部尋遷郎中元光初設三路司農分治戶部以士刺剛稜疾惡材任刺舉授京南路少卿兼郎中未幾以稱職聞是後雖改他官言政者猶以少卿名之正大初擢裕州刺史改睢州是歲大蝗州境獨無有秋大旱禱之而雨識者以爲善政之報三年召爲戶部郎中初置申州輟士刺爲刺史明年城洛陽授

同知中京留守兼同知金昌府事留守移刺瑗雅敬
之事無鉅細諮之而後行俄改汝州防禦使洛陽之
民惜其行祖道填咽度旬日不得發以形迹自嫌竟
由他路去未經歲改陳州土刺老於從政先聲所暨
有識相賀州有東平宣銳軍餘百輩率以戰功得官
有至四品者恃勢作威備極凶悍前使不能制一葛
知府者尤不法土刺捕得之檄送本管一郡帖然考
城胥史所聚結黨爲社有大刀之目把持令佐連起
詔獄細民雖被侵愁而無所於訴公籍其姓名置之
聽事自是無一人敢犯者尋上章請老御史張特立

樂夔上書言陳州防禦使土刺剛直廉介有古良吏
之風今雖年及其黽勉王事強仕之人有不能及者
比聞以例告老而有司亦以例許之貪賢之道誠有
所未盡特望重加拔擢以觀自竭之效書奏落致仕
超授同知開封府事明昌以來鎬厲王衛紹王族屬
皆終身禁錮男女幽閉絕婚嫁之望土刺建言二宅
僇辱旣久賤同匹庶就有詭謀誰與同惡宜釋其宿
怨宏以大度使之各就人道遂生化之性夫國君不
可以讎匹夫讎之則通國皆懼匹夫且然況骨肉乎
語雖不卽從其後天興初元之赦皆聽自便蓋自土

刺發之云六年授武甯軍節度使徐州管內觀察使兼提舉河防使詔旨褒諭道所以遷擢之故且命乘傳赴鎮桃園行樞密院幹魯倉官王邦昌囊橐爲姦盜官糧二萬斛土刺按問得實悉從徵理轉漕爲之少寬踰年以衰病不任得請北渡先是貞祐初宣宗南巡土刺以省掾扈行事出倉卒乃留幼子斜烈於平州之撫甯朔南分裂父子相失者餘二十年斜烈既長立仕宦貴顯歲癸巳汴梁下乃奉朝命迎土刺北歸土刺已老而身見代謝愴然有去國之感顧瞻徘徊不能自己生平植節堅苦食蔬糲不厭既居民

間倍自貶損斜烈有至性妻殷氏尤盡婦道日具甘胞百方奉之而所以自持者不少變一室蕭然使日夕裁足而已人事餽餉瓜果菜茹之細亦峻拒而疾麾之時貴慕其名有謁見曰敕外白不得通曰我亡國之大夫耳尙何言哉初自聊城居宣德惟渾源魏邦彥以簡重得登門與之考論文藝自餘雖鄰舍有不得見其面者後五年戊戌二月終於家年七十三子三德興輔國上將軍次斜烈宣授先鋒使佩金符

總統質子軍次萬僧

元好問遺山集二十

華沙布

原作胡沙補

完顏部人年三十五從軍頗見任用

太祖使富卦喇

原作僕 刮刺

往遼國請阿蘇

原作阿疎

實觀其

形勢還言遼兵不知其數太祖疑之使華沙布往還

報曰遼方調兵尙未大集

金史本傳

惟四院統軍司與甯

江州軍及渤海八百人耳

太祖紀

及見統軍使其孫被

甲立於傍統軍曰人謂汝輩且反故為備耳及行道

中遇渤海軍渤海軍且言且笑曰聞女直欲為亂汝

輩是耶華沙布具以告太祖又曰今舉大事不可後

時若俟河凍則遼兵盛集來攻矣乘其未集早伐之

可以得志太祖深然之及破甯江州戰於達嚕噶

原作達魯城皆有功賜以旗鼓並御器械高永昌請和華

沙布往招之取呼圖克

原作胡 突古

以歸高永昌詐降於

幹魯使華沙布薩巴

原作撒入

往報會高禎降言永昌非

真降者幹魯乃進兵永昌遂殺二人皆支解之華沙

布就執神色自若罵永昌曰汝叛君逆天今日殺我

明日及汝矣至死罵不絕口年五十九天會中與薩

巴俱贈遙鎮節度使

金史本傳

特庫

原作特虎

音德爾

原作雅 達瀾

水人軀幹雄偉敢戰鬪達

嚕噶

原作魯古

城之役和尼

原作活女

陷敵特庫救出之攻

昭蘇

原作照散

城遼兵三千來拒特庫先登敗之攻魯庫

原作盧葛

營瑪奇

原作麻吉

墮馬特庫獨殺遼兵數輩掖而出

之賞賚優渥後從太祖自臨潢班師至遼河伊都原作

睹余來襲羅索原作已引去特庫獨殿馬憊乃步鬪羅

索與數騎來救特庫止之曰我以一死捍敵公勿來

俱斃無益遂沒於陣皇統間贈明威將軍金史本傳

布古德原作僕忽得宗室子初事國相薩哈原作撒改伐蕭哈

哩原作蕭海有功與綽哈原作酬幹招降矩威原作燭儂水部族

領行軍千戶從破黃龍府戰於達嚕噶原作魯古城皆

有功甯江州渤海伊塞布原作乙塞補叛布古德追復之

天輔五年九月復與綽哈往拜格原作鼈古河籍軍馬矩

威水部錫勒哈塔原作實里古達等殺二人投尸水中俱年

四十三太祖悼惜遣使賻弔加等六年正月幹魯伐

錫勒哈塔於希爾根原作石里很河追及於哈達拉原作合達

刺山金史本傳誅首惡四人餘悉撫定太祖紀詔幹魯求二

人尸以葬天眷中贈布古德昭義大將軍綽哈奉國

上將軍綽哈亦宗室子也年十五隸軍以功為穆昆

率屯原作濤温路兵招撫薩木丹原作三坦錫里肯原作石里很巴

噶原作拔苦三水拜格城邑皆降之敗室韋五百於阿爾

噶原作良葛城獲其民眾至是死焉金史本傳

納喇綽奇原作蘭綽赤咸平路雅哈原作伊改河明安人契丹

瓜里原作括里使人招之綽奇不從瓜里兵且至綽奇遂

團結旁近寨爲兵出家馬百餘疋給之教以戰陣擊刺之法相與拒瓜里於改渡口由是賊眾月餘不得進既而瓜里兵四萬人大至綽奇拒戰賊兵十倍遂見執轡而殺之詔贈官兩階二子皆得用蔭金史本傳

舒穆魯元毅

原作石抹元毅

本名舒蘇

原作神思

咸平府路珠徽

垓

原作酌

明安沙瑋噶珊

原作莎里歌仙

穆昆人以蔭補吏

部令史再調景州甯津令有劇盜白晝恣劫爲民害元毅以術防捍賊散去入爲大理知法除同知亳州防禦使事省檄錄陝右五路刑獄無冤人復委受宋歲幣故事私遺物元毅一無所受明昌初驛召爲大

名等路提刑判官以最遷汾陽軍節度副使時石嵐間賊黨嘯聚肆行標掠朝廷命元毅捕之賊畏而遁元毅追襲盡殪之二境以安遷同知武勝軍節度使事別郡有殺人者屢鞫不服元毅訊不數語卽具服河東北路田多山坂磽瘠大比時定爲上賦民力久困朝廷命相地更賦元毅以三壤法平之民賴其利改彰德府治中尋以邊警授撫州刺史會邊將失守芻糧馬牛焚剽殆盡元毅率吏卒三十餘人出州經畫軍餉卒與敵遇州倅與從吏堅請還元毅曰我輩責任邊守遇敵而奔其如百姓何縱得自安復何面

目見朝廷乎

傳無見字依詳校本增

遂執弓矢令眾眾感其忠

爭為效死元毅力戰射無不中敵去而復合元毅氣

愈厲鏖戰久之眾寡不敵遂遇害年四十七事聞上

深驚悼贈信武將軍召用其子世勣侍儀司承應世

勣後登進士第奏名之日上謂宰臣曰此舒蘇子耶

歎賞者久之元毅性沈厚武勇過人每讀書見古人

忠義事未嘗不嗟歎賞慕喜動顏色故臨難能死所

事云

金史本傳

伯特梅和尙

原作伯德梅和尙

泰州人也性鯁直尙氣節正

隆五年收充護衛授赫稜

原作曷魯梳

羣牧副使未幾復

命召為護衛十人長改尙廩局副使轉本局使右衛

軍拱衛使典尙廩者十餘年積勞特遷官二階除復

州刺史明昌初為西北路副招討改秦州防禦使升

武勝軍節度使六年移鎮崇義軍時有事北邊左丞

相瓜爾佳

原作夾谷

清臣行省於臨潢檄為副統會敵入

臨潢梅和尙暨護衛博克托

原作闕合土

等領軍逆擊敵

陣以待梅和尙直擣其陣殺傷甚眾敵知孤軍無繼

聚兵圍之度不能免乃下馬相背射復殺百餘人矢

盡猶以弓提擊為流矢所中死博克托皆沒上聞之

震悼詔贈龍虎衛上將軍躡遷十階特賜錢二十萬

命以禮葬之物皆官給以其子都努原作都奴為軍前明

安中使護喪就差權同知臨潢府事李達可為敕祭

使同知德昌軍節度使事舒嚕原作石抹和尙為敕葬使

承安五年上諭尙書省曰梅和尙死王事其子都努

從軍久有功其議所以酬之乃命為典署丞金史本傳

烏克遜温屯原作烏古孫兀屯上京路人大定末襲明安明

昌七年以本兵充萬戶備邊有功除歸德軍節度副

使改盤安軍察廉遷同知率賓原作速頻路節度事以憂

去官起復歸德府治中遷唐州刺史泰和六年四月

宋皇甫斌步騎萬人侵唐州温屯兵甚少遣泌陽尉

博碩布原作白撒布巡檢布希原作蒲閑各以五十人乘城拒

守温屯見宋兵在城東北者可破令軍士判官薩克

達原作散虎帶以精兵百人自西門出繞出宋兵營後掩

擊之殺數千百人宋兵大亂迨夜乃遁去五月皇甫

斌復以兵數萬來攻行省遣泌陽副巡檢納哈塔原作

納合軍勝救唐州温屯出兵與軍勝合兵城東北設伏

以待之乃分騎兵為三一出一入以致宋兵宋兵陷

於淖伏兵發中衝宋兵為二遂大潰追奔至陽湖斬

首萬餘級獲馬三百匹宋別將以兵三千來襲遇之

竹林寺殪之納哈塔軍勝手殺宋將取金帶印章以

獻詔遷温屯同知河南府事軍勝遷梁縣令各進兩階温屯賞銀三百五十兩重綵十端爲右副元帥完顏匡右翼都統匡取棗陽遣温屯襲神馬坡宋兵五萬人夾水陣以强弩拒岸温屯分兵奪其三橋自辰至午連拔十三柵遂取神馬坡從攻襄至漢江温屯亂流徑度復進一階號平南虎威將軍宋人請和遷河南副統軍大安初遷昌武軍節度使副統軍如故遷西南路招討使温屯御下嚴酷軍士多亡杖六十除同知上京留守事大安三年將兵二萬入衛中都遷元帥右都監轉左都監兼北京留守有功賜金吐

鶻重綵十端遷元帥左監軍留守如故貞祐元年閏月以兵入衛中都詔以兵萬六千人守定興軍敗温

屯戰沒金史本傳

富察羅索原作蒲察叟室東北路按春原作按出虎噶爾罕原作割里

罕明安人泰和三年進士調慶都牟平主簿尋以廉能遷中都右警巡副使補尙書省令史知管差除貞祐初除吏部主事監察御史丁母憂服闋充行省經歷官改京兆治中遙授定西州刺史充元帥參議官興定二年與元帥承裔攻下西和州羅索由秦州進兵抵棧道宋人悉銳來拒羅索乘高立幟策馬旋走

揚塵爲疑兵別遣精騎掩出其後宋兵大潰乘勝遂拔興元進一階除丹州刺史再遷同知河中府事權元帥右都監河東路安撫使復取平陽晉安優詔褒寵進一階賜銀二百兩重幣二十端遙授孟州防禦使權都監如故將兵救鄜州轉戰而前城破死之贈資德大夫定國軍節度使諡襄勇敕行省求其尸以葬

金史本傳

圖們色埒默

原作駝滿斜烈

咸平路明安人襲父明安明昌

中以所部兵充押軍萬戶戍邊承安中討契丹有功除陳州防禦使遷知平涼府事改保大軍節度使徙知彰德府事貞祐四年元兵復取彰德色埒默死焉

金史本傳

烏雅威赫

原作兀顏畏可

隆安路明安人補親軍充護衛除

益都總管府判官中都路副都指揮使累官會州刺史貞祐初爲左衛將軍拱衛直都指揮使山東副統軍安化軍節度使土賊據九仙山爲巢穴威赫擁眾不擊賊愈熾東平行省蒙古綱劾奏威赫不任將帥朝廷不問改鎮西軍權經略副使歷金安

傳作全安依詳校本

改武勝軍興定四年改泰定軍是歲五月兖州破死

焉

金史本傳

烏雅恩徹亨

原作兀顏訛出虎

隆安府明安人大定二十八

年進士累官補尙書省令史除順天軍節度副使召

爲治書侍御史刑部員外郎單州刺史戶部郎中河

東北路按察副使同知大興府事泰州防禦使丁母

憂起復泗州防禦使遷武甯軍節度使徙河平軍兼

都水監坐前在武甯奏軍功不實降沂州防禦使遷

汾陽軍節度使兼經略使金史本傳興定二年九月元兵

徇汾州

宣宗紀

城破死焉

金史本傳

珠嘉托羅海

原作木甲脫魯灰

上京人世爲北京路部長其

先有開國功授北京路蘇克棟阿

原作宋阿答阿

明安托羅

海自幼襲爵貞祐二年宣宗遷汴率本部兵赴中都

扈從上喜特授御前馬步軍都總領宋人略南鄙命

同簽樞密院事時全將大軍南伐托羅海率本部屢

摧宋兵破城寨以功遙授武昌軍節度使元帥右都

監行息蔡等路元帥府事旣而宋人有因畜牧越境

者邏卒擒之法當械送朝廷托羅海曰國家自遷都

以來境土日蹙民力凋耗幸邊無事人稍得息若戮

此曹則邊釁復生兵連禍結矣不如釋之以絕兵端

哀宗卽位授鎮南軍節度使蔡州管內觀察使行戶

工部尙書時元兵入陝西乃上章曰宋人與我爲讐

敵頃以力屈自保非其本心今陝西被兵河南出師
轉戰連年不絕兵死於陣民疲於役國力竭矣壽泗
一帶南接盱楚紅襖賊李全巢穴也萬一宋人謀知
與全乘虛而入腹背受敵非計之得者也臣已令所
部沿邊警柝以備非常宜敕壽泗帥臣謹斥候嚴烽
燧常若敵至此兵法所謂無恃其不來恃吾有以待
之之道也上是而行之正大二年秋傳言宋人將入
侵農司令民先期刈穫托羅海曰夫民所恃以仰事
俯育及供億國家者秋成而已矣今使秋無所穫國
何以仰民何以給遂遣軍巡邏聽民待熟而刈宋人
卒不入寇諜者又報光州汪太尉將以八月發兵來
取真陽議者請籍丁男以備托羅海曰汪太尉懼怯
人耳甯敢爲此必奸人聲言來寇欲使吾民廢務也
不可信已而果然叛人焦風子者沿河南北屢爲反
覆朝廷授以提控之職令將三千人戍遂平四年春
風子謀率其眾入宋托羅海策之以兵數千伏鄱陽
道賊果夜出此途伏發殪之七年元兵攻藍關至八
渡倉退舉朝皆賀以爲無事托羅海獨言曰潼關險
隘兵精足用然商洛以南瀕於宋境大山重複宋人
不知守國家亦不能逾境屯戍元兵若由散關入興

元下金房繞出襄漢北入鄧鄙則大事去矣宜與宋人釋怨諭以輔車之勢唇亡齒寒彼必見從據其險要以備不然必敗是秋改授小關子元帥屯商州大

吉口天興元年春行省參政圖克坦烏登原作徒單兀典將

潼關兵入援至商山遇雪元兵邀擊之士卒饑凍不

能戰而潰托羅海被執不屈拔佩刀自殺金史本傳

吉林通志卷八十六

人物志十五 元明

鈕祜祿重山 子納罕 高諾爾 子元長孫默爾根

伊奇哩 趙良弼

瓜爾佳之奇 張孔孫

奧敦希愷 裴牙失鐵木耳 以上元

王麒 童信

隆萬杭愛 以上明

鈕祜祿重山 按元史改作珠順 金源貴族也國初為質子遂

委質焉 續通志四百五十一 太祖使入宿衛 元史類編十一 官筆且齊

從平諸國有功圍涼州執大旗指揮六軍手中流矢

不動元史一百四十六既官侍從元史類編數得侍宴內廷元史因

諫曰臣聞天子先天下而憂憂之未有不治忘憂未

有能治者置酒為樂忘憂之漸也元史類編帝嘉納之續通

志歲辛卯授左丞相時耶律楚材為右丞相按重山入相據

本紀係太宗三年原傳作太宗時事今改正又按太宗紀三年以耶律楚材為中書令重山為左丞相札

哈為右丞相與此互異凡建官立法任賢使能與夫分郡邑定

課賦通漕運足國用續通志多佐成焉元史類編乙未從伐

宋續通志詔軍前行中書省事許以便宜師入宋境江

淮州邑望風款附降其民三十餘萬取定城天長二

邑不誅一人元史已復還中書視事未踰年卒元史類編贈

太尉封魏國公諡忠武元史戊戌詔其子江淮安撫使

納罕嗣行軍前中書省事續通志時大將察罕圍壽春

七閱月始下按史作七日欲屠城納罕曰不降者獨守將

耳民何罪由是獲免元史類編初世祖伐宋軍於汴納罕

曰李璫承國厚恩坐制一方然其人多詐叛無日矣

帝亦患之元史中統元年兩遷宣撫使三年遷秦蜀五

路四川行中書省事其年李璫反續通志帝使諭納罕

曰卿言猶在耳璫果反矣卿宜謹守西鄙對曰臣謹

受詔不敢以西鄙為陛下憂元史明年授中書平章政

事以病卒續通志諡宣昭封爵如其父元史類編子博袞徹

爾知河中府元史

高諾爾女真人續通志四從太祖征西域盛京通志三十三

復從庫春太子察罕諾延連歲出征累功授總管續通志

志管領山前十路匠軍歲乙未憲宗憫其老元史一百五十

一命子元長襲續通志從世祖渡江攻鄂還鎮隨州至

元二年移鎮季陽五年從元帥阿珠修立白河口新

城鹿門山等處城堡圍襄樊七年充季陽軍馬總管

十年從攻樊城先登十一年從渡江鼓戰艦上流與

宋人戰殺三百餘人奪其船及鎧仗以功賜虎符升

宣武將軍元史十二年進兵丁家洲與孫虎臣等大戰

殺五百餘人又敗夏貴於焦湖從征常州先登續通志

又攻杭州以功進懷遠大將軍二十一年從太子托

歡征交趾追襲交趾世子於大海口奪其戰艦以還

元史二十三年升季陽萬戶復以兵追襲交趾世子於

海之三义口與敵軍合戰中毒矢卒續通志子默爾根

初襲父職領兵鎮廣東盛京通志尋移戍惠州平盜譚

大獠朱珍等元貞元年移戍袁州盜陀頭以眾犯境

悉剿除之元史復平南恩盜遺沒於袁盛京通志贈懷遠

大將軍季陽萬戶府萬戶輕車都尉渤海郡侯元史

伊奇哩女真人續通志四大父實巴衮額布根登金

進士第金亡歸太宗伊奇哩幼穎悟能記誦長以孝

友聞事世祖潛邸得備宿衛元史一百五十四中統初命參

議陝西行樞密院事以商挺佐之比行入奏曰關陝

要地軍務非輕阿爾圖敖拉國之元臣陛下方委任

之伏慮臨時議論不協必誤大計儻有異同臣請得

以上聞帝可其奏遣之元史類編二十八未幾改行省斷事

官復入宿衛李璫平朝議選宿衛之士監漢軍伊奇

哩監軍於毗陽續通志至元七年命為監戰以所領諸

軍圍襄陽築一字堡以張軍勢一時名將索多劉國

傑李庭等皆隸麾下元史攻樊城率眾先登受賜悉分

將士盛京通志三十三十一年從丞相巴延次郢州元史將數

騎而出與宋兵遇有部卒墮馬為所得伊奇哩單騎

橫戈直入其軍奪之還元史類編二十八時糧儲不繼伊奇

哩攻江陵龍灣堡得粟萬石眾賴以濟續通志及兵東

下元史類編宋將夏貴迎戰於陽邏泚阿珠巴延等傳巴

延未至續通志眾欲少俟之伊奇哩曰兵貴神速機不

可失宜及其未定而擊之元史遂前衝貴軍元史類編獲戰

船百餘貴敗走巴延上其功加定遠大將軍元史十二

年攻常州伊奇哩造雲梯繩橋以登遂克之徇下安

吉諸州

續通志

十三年宋降巴延命伊奇哩監守其宮

號令嚴肅秋毫無犯入朝錄功遷昭勇大將軍未幾

拜鎮國上將軍浙江宣慰使鎮守紹興十九年卒元史

子齊拉衮江東廉訪使托克托淮東宣慰使續通志

趙良弼字輔之女真人

名臣事略作趙州贊皇人

本姓兆佳以音

訛為趙家因以趙為氏父兄及兄子凡四人俱為金

死事

元史類編十一

良弼明敏多智略初舉進士教授趙州

元史一百五十九

崔立之亂良弼侍母懷牒及祖父遺繪曰

非是無以知吾生族將歸趙渡河爭舟挺刃及母首

良弼臂受之幾折兵顧見哀之手援以登輦母北歸

日從名儒講論尤致意司馬通鑑歷代典章制度地

理阨塞

姚燾廟碑

世祖在潛藩召對稱旨

續通志四百六十四會立

邢州安撫司擢為幕長區畫有方事或掣肘則請諸

藩邸再閱歲邢大治戶口增倍

續通志

世祖在潛藩時

分地在關陝奏以廉希憲商挺宣撫陝西以良弼參

議司事

元史

阿勒達爾劉太平鈞校京兆錢穀

續通志煨

煉死者二十餘人眾皆股栗良弼力陳大義詞氣慷

慨二人卒不能誣以故宣撫司一無所坐

元史類編

已未

世祖南征召參議元帥府事兼江淮安撫使續通志親

執桴鼓率先士卒五戰皆捷禁焚廬舍殺降民所至

宣布恩德民皆安堵元史宣宗崩世祖北還元史良弼

陳時務十二事言皆有徵元史遣如京兆訪秦蜀事宜

得實還報續通志曰宗王穆格無他心宜以西南六盤

悉委屬之瑄塔哈屯軍六盤土馬精強咸思北歸恐

事有不意元史耨埒總秦川蒙古諸軍年少鷲勇輕去

就當寵以重職速解其兵柄劉太平霍魯懷聲言辦

餉陰有據秦蜀志元史伯嘉努劉黑馬汪惟正兄弟

蒙被德惠俱悉心俟命元史後皆如其言元史中統元

年廉希憲商挺宣撫秦蜀續通志良弼為參議良弼先

行元史時瑄塔哈叛北歸續通志良弼與宣撫決計執其

黨奇爾台布哈密喇卜和卓誅之元史希憲及挺慮

有擅殺名續通志遣使入奏待罪良弼具密狀授使者

言始遣捕二帥時元史止令囚以待報臣竊以為張皇

不便宜急誅擅殺在臣實不在宣撫使若上怒願使

者即出此奏元史帝竟不問元史蜀降將費寅與廉希憲及商

挺傳以私憾誣希憲與挺在京兆有異志引良弼為

證元史帝召良弼詰問良弼泣曰二臣忠良保無是

心願剖臣心以明之帝意不釋會平李璫得王文統

交通書元史益疑二臣切責良弼至欲斷其舌良弼誓

死不少變帝意乃解寅卒以反誅元史至元七年按

本國傳良弼使日奉使日本先是數遣使通日本卒

不得要領至是良弼請行乃授秘書監給兵三千以

從續通志良弼辭獨與書狀官二十四人俱舟至金津

島其國人望見使舟元史輒舉刃相向良弼舍舟登岸

宣旨金津守延入板屋環以兵元史類編滅燭大譟

良弼凝然自若天明其國太宰府官陳兵四山問使

者來狀良弼數其不恭罪仍喻以禮意元史太宰府官

愧服求國書良弼曰必見汝國王始授之越數日復

來求書至以兵脇良弼續通志良弼曰不見汝國王甯

持我首去書不可得也日本知不可屈遣使介十二

人入覲元史送良弼至對馬島十年至自日本續通志入

見帝詢知其故曰卿可謂不辱君命矣元史後帝將討

日本數問良弼良弼言勿擊便續通志十一年同僉書

樞密院事丞相巴延伐宋良弼言宋重兵在揚州元史

宜以大軍先擣臨安元史類編後訖如其計又言宋亡江

南士人多廢學宜設經史科以育人材定律令以戢

姦吏帝嘗從容問曰高麗小國也匠工奕技皆勝漢

人至於儒人皆通經書學孔孟漢人惟務課賦吟詩

將何用焉良弼對曰此非學者之病在國家所尚何

如耳元史久之以疾辭元史類編得旨居懷孟良弼別業在

温縣故有地三千畝乃析爲二六與懷州四與孟州

皆永隸廟學以贍生徒自以出身儒素示不忘本也

元史或問爲治之要良弼曰必有忍乃克有濟元史類編人

性易發而難制者惟怒爲甚必克已然後可以制怒

必順理然後可以忘怒能忍所難忍容所難容事斯

濟矣元史二十三年卒追封韓國公諡文正續通志子訓

陝西平章政事元史

瓜爾佳之奇字士常其先出女眞瓜爾佳部後由瑪

奇嶺薩哈水徙家於滕州元史一百七十四少孤舅氏攜之

至東平因受業於康煜授濟甯教授續通志四十六大兵

南伐授行省左右司都事元史類編二十一時行省官與中

書權臣有隙特遣使覈其財用之奇職文書亦被按

問元史元帥張宏範率其屬詣使者言瓜爾佳都事素

公清若少有侵漁當與連坐元史類編會御史臺立擢僉

江南浙西道提刑按察司事續通志至元十九年召爲

吏部郎中立陟降澄汰之法著爲令式歲大旱有司

議平穀價以遏騰涌之患之奇言莫若省經費輟土

木之役庶足召和氣弭災變而有豐稔之期元史尋遷

左贊善時裕宗爲皇太子每進見必賜坐顧遇良厚

權臣有欲以均輸法益國賦者慮按察使撓其事元史

類編請令與轉運司併為一職詔集羣臣議之元史之奇

言按察司控制諸路續通志發摘姦伏責任匪輕若使

理財則心勞事冗將彌縫自救之不暇又安能繩糾

他人哉併之弗便事遂寢元史又與諭德李謙條具時

政十事上之皇太子一日正心二曰睦親三曰崇儉

四曰幾諫五日戢兵六曰親賢原史脫第七條無八

日尙友九曰定律十曰正名除翰林直學士改侍御

史續通志二十五年丁母憂以吏部尙書起復屢請終

制不許明年卒元史之奇慮精識審為政卓卓可稱雖

老於吏學者自以為不及而為文章尤簡嚴有法多

傳於世續通志

張孔孫字夢符其先出遼之烏舍部為金所并遷隆

安續通志四父之純按曲阜金重修文宣王廟碑陰

百六十八純題名雲中魏璠隆安張澄泊男

孔孫此作之官東平萬戶府參議夜夢謁孔廟得賜

嘉果已而生子因名孔孫既長以文學著辟萬戶府

議事官元史類編萬戶嚴忠範之兄為陝西行省平

章政事聘孔孫以母老不應元史一百中統三年徐

世隆奏帝宜增設宮縣及文武二舞以備大典因詔

世隆為太常卿孔孫以奉禮郎為之副以董樂師肄

成獻之京師續通志廉希憲居政府辟為掾及安圖為

相尤禮重之授戶部員外郎元史尋出為南京總管府

判官時方議下襄樊世祖銳意用兵孔孫謂方今越

境私販坐罪者動以千數宜開自新之條俾效戰贖

死朝論采之元史類編尋升湖北道提刑按察副使行部

巴陵有囚三百人因怒龔乙建言興銀利發其墳墓

而燒其家燒死者三人有可以真圖財殺人坐之孔

孫原其情減罪元史類編歷拜侍御史臺事賢聲大起元史類編

至元二十二年安圖復入相按安圖傳復拜為尚書右丞相在至元二十一年

年言於帝曰阿哈瑪特顯政十年親故迎合者往往

驟進據顯位獨劉宣張孔孫二人安守故常終始如

一乃除宣吏部尚書孔孫禮部尚書元史督修安山河

成孔孫言開魏博之渠通江淮之運古所未有賜名

會通河已擢燕南按察使元史類編一以所沒贓糶粟五

千斛振饑民元史亡何除大名路總管兼府尹大興學

校有獻故河隄三百餘里於太后者即上章謂宜悉

還細民從之續通志擢淮東道肅政廉訪司使因讞獄

鹽場民尹執中兄弟誣伏為強盜平反之元史召拜集

賢大學士丞相鄂勒哲卒孔孫與陳天祥上封事薦

和爾果斯可為相會地震詔問弭災之道孔孫條對

八事其畧曰蠻夷諸國不可窮兵遠討濫官放譴不

可復加任用賞善罰惡不可數賜赦宥獻鬻寶貨不可不加禁絕供佛無益不可虛費財用上下豪侈不可不從儉約官冗吏繁不可不為裁減太廟神主不可不備祭享帝悉嘉納之續通志又累疏言凡七十致仕者宜加一官丁憂服闋者宜待起復宿衛之冒濫者必當革州郡之職必當遴選久任達嚕噶齊宜量加遷轉又宜增給官吏俸祿修建京師廟學設國子生徒給賜曲阜孔廟灑掃戶相位宜參用儒臣不可專任文吏故相安圖巴延和爾果斯廉希憲等各宜贈諡元史多允行久之請老致仕大德十一年卒於家

元史類編孔孫素以文學名且善琴工畫山水竹石而騎

射尤精及其立朝讜言嘉論有可觀者士論服之元史

奧敦希愷按金史氏族奧敦當改為鄂屯女直人父保和以元帥領

保定順德諸道農事凡闢田二十餘萬畝致仕卒希

愷曩勸農事郡縣水旱力請蠲租及調知冀州變健

訟之俗奪蒙古所侵民田歸於民陞河中知府秩滿

歸調以不見權臣阿哈馬降知景州盛京通志三十三

裴牙失帖木兒以音求之裴雅失當改為費雅爾斯帖木兒據元史語當改為特穆爾女

直人沈毅有勇略洪武時授百戶歷戰有功陞千戶

後又以功陞三萬衛指揮僉事訓練土馬勞來遠人

尋陞指揮同知同上

王麒建州松花江人壯勇善射建文時從燕兵南下

小河之戰矢不虛發累陞遼東都督同知明一統志二十五

童信三萬衛人建文初從燕兵南下勇敢負氣每戰

輒有奇功累官至都督同上

隆萬杭愛生而智勇過人敦信義睦鄰里輕財好施

故附近村落咸歸之性喜捕虎殺虎至九十有九一

日方祭祀家人報園有虎即持鎗往追躍上虎背以

鎗戮之虎亦嚙其足虎死隆萬杭愛亦被傷顧謂家

人曰此吾命也後世子孫當繪吾騎虎像祭之遂卒

生四子長鄂和睦仲鄂克除叔車特庫季占楚庫偏

武鄂和睦生達晉都督達晉都督生達爾漢都督達

爾漢都督生王楚偏武王楚偏武生噶哈噶哈生努

爾漢努爾漢生魯克素魯克素生護齊哈達齊哈是

時

太祖高皇帝龍飛遼左護齊哈兄弟二人率族眾來歸八旗通志

二百三十七
儒林傳下

